

Morning Regional Dogri News Bulletin, 12th May 2024

मार्निंग डोगरी न्यूज़ बुलेटिन, समें. 09-20 Hrs



Headlines

1. श्रीनगर लोकसभा सीट दे चुनां लेई सब्बै तैआरियां मुकम्मल, जित्थें कल 17 लक्ख 47 ज्हार कोला मते मतदाता वोट पाने दे अपने अधिकार दा इस्तेमाल करगंन।
2. केन्द्री गृह सचिव होरें कश्मीर घाटी दिएं त्रऊं लोकसभा सीट लेई होने आले मतदान लेई सुरक्षा स्थिति दा जायजा लैता।
3. बसंतगढ़ आतंकी हमले आले मामले च इक महत्वपूर्ण उपलब्धि। आतंकवादिएं गी समेयान पजाने आला इक ओवर ग्राउंड वर्कर गिरफ्तार। पुलसै 6 होर आतंकवादिएं दे स्कैच जारी कीते।
4. जम्मू कश्मीर च लोआई गेदी दूई राष्ट्रीय लोक अदालतै च 1 लक्ख 22 ज्हार 549 मामलें दा नबेड़ा कीता गेआ।



Srinagar Polling

चला'रदे लोकसभा चुनां दे चौथे गेड़ च होरने सीटें दे अलावा 13 मई गी श्रीनगर संसदीय हल्के च बी वोट पाए जांगन। इत्थें कुल 17 लक्ख 47 ज्हार 810 मतदाता न, जिंदे चा 8 लक्ख 75 ज्हार 338 मर्द ते 8 लक्ख 71 ज्हार 808 महिला, 64 ट्रांसजेंडर ते तकरीबन 11 ज्हार 682 दिव्यागें सनें 705 वोट नेह् बी ऐन जिंदी उमर 100 बरें कोला बद्ध ऐ। एह कल अपने वोट पाने आले हक्कै दा इस्तेमाल करदे होई 24 मेदवारें दी किस्मत दा फैसला करगंन। श्रीनगर, पुलवामा, बउगाम, गांदरबल ते शोपियां 5एं जिलें च 2 ज्हार 135 मतदान केन्द्र स्थापत कीते गेदे न। टकोहदा प्रबंधें तैह्त 20 पोलिंग स्टेशनें दा रक्ख-रखाव कम्मकाज महिला अमला करा'रदियां न। इंदे अलावा 18एं केन्द्रें दा प्रबंध दिव्यागें ते 17एं मतदान केन्द्रें पर नोजवान अपने कम्मै गी अंजाम देंगन कन्नै गै 21 पर्यावरण सरबंधी चैताएं बारे सनेआ देने ताई 21 ग्रीन पोलिंग स्टेशन बी खडेरे गेदे न। इनें टकोहदे मतदान केन्द्रें गी खडेरने दा मकसद महिलाएं, दिव्यागें ते पैहली बारी वोट पान जा'रदे नोजवानें बश्कार जागरूकता फलाना ऐ तां जे ओह् अग्गे औने ते मतदान पाने आले अपने हक्के दा इस्तेमाल करन। सब्बै मतदान केन्द्रें पर लोड़चदियां सहूलतां उपलब्ध करोआई जा'रदियां न। श्रीनगर संसदीय हल्के च चुनां प्रचार कल संजा चुनां कोला 48 घैंटे पैहले खत्म होई गेआ ऐ।



Home Secretary

केन्द्री गृह सचिव ए.के.भल्ला होरें कश्मीर घाटी च होने आले लोकसभा चुनां दे अगले त्रऊं गेडें, जिंदे तैहत 13, 20 ते 25 मई गी वोट पोआए जाने न, दे सिलसिले च कश्मीर घाटी ते जम्मू प्रांतै दे सरहदी जिले पुंछ ते राजौरी दे मजूदा सुरखा हालात दा जायजा लैता। बैठका च सिविल ते पुलस प्रशासन दे इलावा, थेआरबंद बलें ते खूफिया अजेंसिएं दे बड्डे अफसर बी मजूद हे। भल्ला होरें चेचे तौरा पर श्रीनगर दा दौरा बी कीता। कश्मीर घाटी दी श्रीनगर लोकसभा सीट लेई चौथे गेड तैहत 13 मई गी, बारामुला सीट पर 5में गेड तैहत 20 तरीक गी ते राजौरी-अनंतनाग सीट लेई 6में गेड तैहत 25 मई गी वोट पोआए जांगन। बैठका च होरने इे इलावा जम्मू कश्मीर दे मुख्य सचिव अटल डुल्लू, गृह विभाग दे प्रधान सचिव चन्द्राकर भारती ते पुलस महानिदेशक आर.आर.स्वैन बी मजूद हे।



Basantgarh

जम्मू कश्मीर पुलसै कल 6एं होर आतंकवादिएं दे स्कैच जारी कीते न, जेहडे उधमपुर जिले दे उप्परले पहाडी इलाके बसंतगढ दे जंगलें च छप्पे दे न। पुलसै दस्सेआ ऐ जे कोई 10-12 आतंकवादिएं दे इस इलाके च छप्पे होने दी शैका ऐ ते हासल सूहें दी बिनाह पर होर स्कैच तैआर कीते जा करदे न, जिसलै जे इनें आतंकवादिएं गी तुप्पी फगडने लेई अभियान बरोबर जारी ऐ। तोआई उधमपुर पुलसै आतंकवादी गुटें गी मदद पजाने आले जावेद नां दे इक ओवर ग्राउंड वर्कर गी गिरफ्तार करी लैता ऐ। एसएसपी उधमपुर जोगिंदर सिंह मूजब जंगलै च छप्पे दे आतंकवादी 28 अप्रैल गी लोअर पनारा च ग्राम रक्षा गार्ड मोहम्मद शरीफ दी हत्या च शामिल हे। गिरफ्तार कीते गेदे आतंकवादिएं दे सैहयोगी बारे जानकारी दिंदे होई एसएसपी होरें आखेआ जे बसंतगढ च इक टोकै च रौहने आले जावेद कोला पुच्छ-गिच्छ दरान पता लग्गा ऐ जे ओ आतंकवादिएं गी थेआर ते होर दुआ समेयान पजाने च मदद करदा हा।



Badrinath Dham

उत्तराखंड दे चमोली जिले च स्थित प्रसिद्ध ब्रद्रीनाथ धाम दे कपाट अज्ज बडलै 6 बजे वैदिक मंत्रें दे उच्चारण कन्नै खुली गे न। इस मोके पर बडी मती गिनतरी च श्रद्धालु मजूद हे। मंदर गी फुल्लें कन्ने सजाया गेआ ऐ। श्रद्धालुएं गी आसानी नै दर्शन करोआने लेई प्रशासन नै खास इंतजाम कीते दे न। ब्रद्रीनाथ धाम दे कपाट खुल्लने कन्नै गै सारे चारे धाम श्रद्धालुएं लेई खुली गे न। एह्दे शा पैहले केदारनाथ, यमनोत्री ते गंगोत्री धाम दे कपाट 10 मई गी खोली दित्ते गे हे।



Vaishno Devi

इस ब'रे 10 मई तगर 3 लक्ख कोला मते श्रद्धालु श्री माता वैष्णो देवी जी दे दरबार च मत्था टेकी चुके दे न।
इनें दिनें हर रोज कोई 40 ज्हार दे कोलकाल श्रद्धालु पवित्र यात्रा लेई कटड़ा पुज्जा करदे न।



Mother's Day

मौरीं लेई प्यार, हमदर्दी ते सम्मान प्रगट करने दा प्रतीक ध्याड़ा "मदर्स डे" अज्ज देश दे दुनिया दे बाकी हिस्से आला लेखा जम्मू च बी मनाया जा'रदा ऐ। इस सिलसिले च पिछले केइएँ दिने थमां बजारें च कार्डें, तौहफें, फुल्लें, चाकलेटें ते होरने दकानें पर खूब समेयान सजे दे लब्भा करदे जिनेंगी खरीदियै लोक अपनी माएं प्रति आदर, प्रेम ते सम्मान अज्जै दे रोज प्रगट करदे न। एह ध्याड़ा हर ब'रे मई म्हीने दे दुए ऐतवार गी मनाया जंदा ऐ जिसलै जे एहदी शुरूआत 1908 च अमरीका दे पच्छमी वजीर्निया च एना जार्विस नै अपनी माता दे चेतें च एह ध्याड़ा मनाने दी शुरूआत कीती ही ते एह चलन अज्ज पूरी दुनिया च मशहूर ते लोकप्रिय होई चुके दा ऐ, इस भावना कन्नै जे अपनी मौरीं प्रति प्यार प्रगट करना हर धीह पुत्तर दा फर्ज बनदा ऐ।



National Lok Adalat

समूलचे जम्मू कश्मीर च कल कनूनी सेवा संसीनें पास्सेआ दिन भर लोआई गेदिएं लोक अदालतें च 38 पीठें कुल 1 लक्ख 28 ज्हार 959 मामलें दी सुनवाई करदे होई 1 लक्ख 22 ज्हार 543 दा नबेड़ा कीता। इनें राश्ट्री लोक अदालतें च मोटर गड्डिडएं दे हादसें, फौजदारी, लेबर विवाद, बिजली ते पानी बिल, जिमीं अधिग्रहण, पारावारिक, चैक बांउस होने आले मामलें सनें होर नेकें मामलें च 42 रोड़ 73 लक्ख 80 ज्हार 904 रपें दी रकम कन्नै मुआवजे, समझोते करोआए गे। इनें अदालतें दा सरिस्ता जम्मू कश्मीर ते लद्दाख हाई कोर्ट दे चीफ जस्टिस न्यायमूर्ति एन.कोटेश्वर सिंह ते जस्टिस ताशी रबस्तान हुंदी सरप्ररस्ती च आयोजित कीतियां गेइयां।



ISRO

भारती अंतरिक्ष अनुसंधान संगठन इसरो नै तरल राकेट इंज नदी कामयाब अजमैश करियै नमां रिकार्ड कायम कीता ऐ। इस इंजन च भलेआं अज्जै कल्लै दी एडिटिव मैनुफैक्चरिंग तकनीक दी बरतून कीती गई ऐ। नमें सिरैया डिजाइन कीते गेदे पीएस-4 इंजन गी बनाने लेई अपनाई गेदी तकनीक नै एह्दे हिस्से दी गिनतरी 14 कोला घटाइयै 1 करी दित्ती ऐ ते वैटिडिंग करियै पाए गेदे जोड़ खत्म करी दित्ते गे न। इस सुधार कन्नै पही इंजन कच्चे माल दी लागत च बी बचत होग। इंजन च जित्थें पैहले धातु पाउडर 565 किलोग्राम इस्तेमाल होंदा हा, इस केह्ड़े इंजन च एह्दा शड़ा 13 किलो 7 ग्राम इस्तेमाल होआ ऐ। नमें इंजन दा इस्तेमाल पीएसएलवी प्रक्षेपण यान दे चौथे चरण ते पीएसएलवी च पैहले चरण दी रिसपांस कंट्रोल सिस्टम च बी कीता जाग। एह्दे इलावा इसरो, पीएस-4 इंजन गी बकायदगी कन्नै पीएसएलवी कार्यक्रम च शामिल करने दी बी योजना बना करदा ऐ।



DC-School Transport

जिला कलेक्टर सचिन कुमार वैश्य होरें जिले च स्कूलें आस्सेआ चलाई जा'रदियां स्कूली बसें च बच्चें दी सुरक्षा जकीनी बनाने तांई बक्ख-बक्ख स्कूलें दे प्रिंसिपलें कन्नै कल लगी दी इक बैठक दी प्रधानता कीती। श्री वैश्य होरें इस गल्ला पर जोर पाया जे बच्चें दी सुरक्षा जिला प्रशासन दी प्राािमिकता ऐ ते विद्यार्थिंएं लेई कुसै गैर पंजीकृत जां असुरक्षित गड्डी गी दनां क बी बरदाश्त नेई कीता जाग। उनें अभिभावकें गी बी सौहगा कीता जे प्राइवेट गड्डिंएं च मती भीड़ करियै होने आले कुसै बी हादसे दे मामले च उनेंगी बी बरोबर तौरा पर जिम्मेदार ठैहराया जाग। बैइक च सड़क परिवहन मैहकमा ते ट्रैफिक पुलस अफसरें दी स्कूली बसें दी निगरानी करने तांई तैनाती पर बी गल्लबात कीती गई।



Medical Camp

राजौरी जिले दी केरी थाहर सेना पाससेआ गुज्जर ते बक्करवाल समुदाय गी सेहत सरबंधी सहूलत पुजांदे होई कल इक गश्ती मैडिकल कैंप दा सरिस्ता कीता गेआ। इस गश्ती कैंप दा मकसद इलाके दे उनें दूर दरेड़े इलाकें तोड़ी लोड़चदियां सेहत सहूलतां उपलब्ध करोआना हा जित्थें पुज्ज सखल्ली नेई ऐ। एह पैहल गुजजर ते बक्करवाल समुदायें दी भलाई बेहतरी लेई सेना दी वचनबद्धता गी दस्सदी ऐ तां जे कोई बी जना लोड़चदी मैडिकल सेवा थमां पिच्छे नेई रवै।



Ramban EPC

अंतर्राष्ट्रीय नर्स दिवस 2024 दे सरबंधे च कल रामबन जिले च साढ़िया नर्सा साढा भविकख-दिकख रिक्ख दी माली ताकत सिरलेख कन्नै कार्जक्रम शुरू होआ। दिशा इंस्टीच्यूअ ऑफ पैरा मैडिकल एंउ नस्रिंग सांइसेज रामबन ते होर दुए सेहत केन्द्र नर्से दे अनमुले योगदान गी उजागर करदे होई उंदा सम्मान करगंन। इस मौके बोलदे होई मैडिकल सुपरीटेंडिंट होरें सेहत सेवा क्षेत्र च नर्से दी भूमका पर लोह् पाई जेड़ियां समर्पण, दया ते अपनिएं अनकथ कोश्टें कन्नै मरीजें दियां दिकख-रिक्ख करदियां न।

<><><><><><>